

陰符經疏
陰符經略
陰符經解

陰符經考異
陰符經解



陰
符
經
疏
略

王文祿
撰

中
華
書
局

叢書集成初編

陰符經疏（及其他四種）

中華書局 出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之二

統一書號：ISBN7—101—00894—1/K·367

陰符經疏略

此據百陵學山本
影印初編各叢書
僅有此本

陰符經疏畧序

俯仰宇宙變態靡恒元坐層樓沉思寧寂疏廣成子
又疏陰符經皆嘉靖癸亥夏五望也何畧乎欲詳而
莫考爾初予髫齡得黃帝陰符經三篇誦之上曰神
仙抱一演道章中曰富國安民演法章下曰強兵戰
勝演術章殆寓言也或曰玄女暨廣成子授世遠莫
知云少室山人李筌于嵩山虎口巖石壁中素絹朱
書絳繒緘曰大魏太平真君二年七月七日上清道
士寇謙之藏抄記未喻入秦驪山逢老姥口授玄義
黃山谷黃東發疑筌偽撰閻丘主簿進呈謂非黃帝

不能撰永徽五年勅褚遂良寫一百二十卷予因疏而深討之始信非黃帝不能撰也夫筌與遂良唐人也陰符文氣雄勁非唐格義玄而句鏗峻達過素問豈筌能撰設筌撰遂良何不疑且素問亦疑戰國人撰然參究三才之原發前聖之未發戰國寧有是人乎疑之者妄爾故曰信非黃帝不能撰也黃帝曰廣成子之謂天矣予曰黃帝其天乎不然何善言天至此也經曰符符曰陰陰暗也符合也參同契曰天符曰日符曰合符行中蓋陽為命陰為符人身曰火符經中言修煉進退符火也曰陰符殆此郝伯常曰陰

符三百餘言理無不備聖人發其機而藏於密者也
凡道術治體數學兵家志士處士養生得之各底於
成其體則靜其用無窮然後知至言必簡也予勉爲
疏尚慮有遺示江右劉曉山曰請梓之予曰未也曰
理一而已何歎乎曰非也通志畧文獻通考載諸家
註頗多元趙素且集數十家註豈無一得乎非詳考
未敢梓也于是數訪藏書家弗得淡泉鄭公謂予曰
默泉吳年兄有道藏經可問之甲子春仲至嘉禾扣
默泉公公諾明發檢借三函總名洞真玉訣註陰符
凡三十五家攜歸併晝夜誦畢返舊見頓新成美盛

心曷諉也又參驪山義及西谷釋証潤焉予所獨得
迂見若先後天之分合五賊之名蛇龍之殺機巧拙
之擬木火國奸之喻食時動機之微盜機之得樂靜
之根雷風禽制之氣知仁勇之配演章之發揮脈絡
接承首尾照應諸家未之及也此書殆出廣成子治
身為先抱神守一為要觀天執天不外也嘉禾知玄
學西谷始朱姓諱綬字文佩楚左史釋雖未瑩義則
多闡先康毅君嘗稱曰耄齡童顏仙如也默泉公嗜
玄匹西谷云噫功利浮雲太虛至靜夫人空早悟焉
可也是歲孟夏吉海鹽沂陽生王文祿世庶撰

陰符經

浙嘉郡武原王文祿疏畧

神仙抱一演道章

一為道樞抱不二也神仙全真云演廣喻也
觀天之道執天之行盡矣

天一氣也先天後天一也虛無故神凡地載者莫
不包也故統曰天一陰一陽曰道陰陽相推曰行
目見曰觀手持曰執身心體悟非可拘于手目也
曰盡矣觀執之外無餘蘊焉觀天道若悟先天執
天行若體後天此二句大綱天宇諛貫也

天有五賊見之者昌五賊在心施行于天宇宙在乎

手萬化生乎身

天數五地數五宇宙萬化不外五數賊盜也五賊
卽三盜盜機也心卽天身之主也在心心與天通
也見卽觀施行卽執體悟盜機則宇宙萬化在手
生身與天一也故曰昌字指天地宙指古今化指
變萬指極數五賊一曰五行一曰命物時功神一
曰耳目口鼻身

天性人也人心機也立天之道以定人也

性者人心中天命也道者率性也機者性之神應
不測也心性機道天人一也立兼觀執中不倚也

人能盡心知性，遡殺機，盜生機，立天道，所以定人。
天發殺機，龍蛇起陸，人發殺機，天地反覆，天人合發，
萬化定基。

機卽前心機，及後盜機，陽生陰殺，互根也。一氣耳。
龍蛇陰盛閉蟄，陽盛起陸，蛇變龍，伏藏陸中，若閉。
蟄然靜極，純陽起陸也。夫閉蟄伏藏，殺機也。起陸
生機也。生機根殺機，欲盜生機，先遡殺機發之發。
殺機所以盜生機也。龍蛇性拙，故曰天發人能抱。
神以靜卽閉蟄，伏藏陰盡，陽純地天交泰，反覆也。
冲舉若起陸，然人性巧，故曰人發人發卽天發也。

故曰合發天人一也宇宙萬化本乎心故曰定基
基以合發而後定也發者心發之也借龍蛇喻修
煉陳搏好睡五龍蟄法云一本增移星易宿地發
殺機非也一本龍蛇起陸下接地發殺機星辰隕
伏蓋星乃下土人物之氣凝之曰地發亦天也
性有巧拙可以伏藏

承前言人性巧龍蛇性拙拙若愚巧若哲性一也
質殊耳可以伏藏無不可化也至公而自私也
九竅之邪在乎三要可以動靜

人身九竅通心竅也三竅充要目耳口也九竅之

邪由三竅入動靜生死之門也故曰要必無視無聽塞兌不言慎內閉外動亦靜靜亦靜則邪不入而純陽也一指精氣神為內三要

火生于木禍發必剋奸生于國時動必濟知之脩煉是謂聖人

火生于木猶奸生于國禍發必尅猶時動必濟火奸喻邪情木國喻真性剋濟喻邪情亂真性也夫木生火國生奸生者恩也火剋木奸濟國剋濟害也卽害生于恩禍發火過烈也時動動奸非時也元則害大貞凶也能知而反之木息火不剋國

化奸不潰承乃制小貞吉也卽復性除情伏藏動靜致中和也故曰知之脩煉是謂聖人聖誠而明無不知也此章猶知以知之

富國安民演法章

國民以法制富安保治也演廣喻云

天生天殺道之理也

生殺本天指道之理陰陽消長自然條理也起後逆盜殺中之生耳一本無此句一本此句在前章天地萬物之盜萬物人之盜人萬物之盜三盜旣空三才旣安

盜賊也虛無中巧竊莫能見知猶五賊盜機也天地人物三才本一氣也三才相巧竊故曰三盜人者天地之心萬物之命也食時動機盜竊真氣三盜盡空則三才盡安矣既盡也

故曰食其時百骸理動其機萬化安

前盜字已含食時動機意故曰二字原前也時天時也食天時所以順人時賢食不爽時機殺機也動殺機所以逆生機賢動不違機時機互根也岐伯曰天食人五氣地食人五味五氣入鼻藏心肺五味入口藏腸胃味養氣氣和成津液生神味陰

也氣陽也人知食味而不知食氣氣機動于子時
守中調息食時動機也骸理化安指其驗云

人知其神而神不知不神而所以神也

人知陰陽不測謂神不知陰陽從虛無生此混沌
所以開闢卽不神之所以神也臭腐化神奇亦此
日月有數大小有定聖功生焉神明出焉

離爲日納坤陽中陰也坎爲月納乾陰中陽也大
爲陽小爲陰周天遲速有定數也日月合坎離交
陰陽升降坤乾成泰聖功神明由顯甚微也故次
曰其盜機賢心悟而自得焉

其盜機也天下莫能見莫能知君子得之固躬小人得之輕命

其字承前聖功神明來惟虛無律曆不能契天下莫能見知也故曰盜機所以見者昌知脩煉者聖夫機一也曰心曰殺曰盜曰神陰陽不測也人一也曰君子曰小人愚哲不移也得一也曰固躬曰輕命見知不同也君子屬陽而明食時動機骸理而化安形神俱妙故曰固躬所以立命也小人屬陰而暗違時昧機逞能而傲世至喪吾寶故曰輕命原無忌憚也嘉君子之自得戒小人之幸得云